

HOLY SEE PRESS OFFICE
OFICINA DE PRENSA DE LA SANTA SEDE



BUREAU DE PRESSE DU SAINT-SIEGE
PRESSEAMT DES HEILIGEN STUHLS

BOLETTINO

SALA STAMPA DELLA SANTA SEDE

N. 0605

Sabato 08.08.2015

Lettera del Santo Padre all’Inviato Speciale alla celebrazione del III centenario del Santuario della Madonna miracolosa di Sinj (Sinj, Croazia, 15 agosto 2015)

In data 21 luglio, è stata pubblicata la nomina dell’Em.mo Card. Josip Bozanić, Arcivescovo di Zagabria, ad Inviato Speciale del Santo Padre alla celebrazione del 300° anniversario del Santuario della “Madonna miracolosa di Sinj”, nell’arcidiocesi di Spalato-Makarska (Croazia), in programma il 15 agosto 2015.

L’Inviato Speciale sarà accompagnato da una Missione composta dai seguenti Ecclesiastici:

Fra Petar Klapež, Guardiano del Santuario di Sinj;

Don Stjepan Ljubas, Decano di Cetina e Parroco di Trilj.

Pubblichiamo di seguito la Lettera del Santo Padre all’Em.mo Card. Josip Bozanić

Lettera del Santo Padre

Venerabili Fratri Nostro

IOSEPHO S.R.E. Cardinali BOZANIĆ

Archiepiscopo Metropolitae Zagrebiensi

Ad dilectum Croatiae populum cum mens cogitatioque advolant Nostrae, suavissima afficimur laetitia de inclita devotione Mariali, quam ille fovet apud Sanctuarium Signi Beatissimae Virgini Mariae dicatum. Haud enim ignotum est Nobis quam fervide anno MDCCXV gens Setoviensis, fratribus Franciscanis adhortantibus, flagitavit a Deo ne urbs eius impetu hostium impugnaretur.

Quisnam dubitare potest quin Sanctissima Mater Dei, cum filii eius quibusvis comminationibus vexentur, eos protegere desistat? Immo vero Beatissima Virgo Maria omnia mystici Corporis Christi membra complectitur, qua

re Advocata et Mediatrix gratiarum ab Ecclesia iamdudum appellatur.

Cum igitur devotio Marialis intimum manifestet nexum huius Sanctissimae Mulieris Nazarenæ cum divino consilio de redēptione humani generis (cfr *Lumen gentium*, 65), vehementer laetati sumus cum primum ad aures Nostras advenit notitia de sollempnitatibus quae fient in occasione diei aniversarii trecentesimi victoriae Matris Miraculorum Signi. Immo libentissime audivimus petitionem Venerabilis Fratris Marini Barišić, Archiepiscopi Metropolitæ Spalatensis-Macarscensis, qui, simul cum Fratribus Iosepho Kodžoman, O.F.M., Moderatore Provinciali, atque Petro Klapež, O.F.M., Custode Sanctuarii, postulaverunt ut mitteremus aliquem Legatum ad Sanctuarium Setoviense ut praesentia Nostra propinquius sentiatur in hac commemoratione victoriae Signi Matris Miraculorum. Piae huic postulationi Nos adnuentes ad Te ipsum, Venerabilis Frater Noster, revertimur, quippe qui, Patris purpurati dignitate ornatus necnon devotioni Marianæ deditus, plurimum, ut opinamur, conferre possis ut participantes hunc eventum certiores fiant de profusa caritate qua illos diligimus ac de sollertia qua precationes pro iisdem fundimus.

Quapropter his Litteris nominamus te Missum Extraordinarium NOSTRUM ac renuntiamus ut Nostram geras personam apud Sanctuarium Signi die decimo quinto proximi mensis Augusti.

Haec celebratio faveat insuper devotioni erga Beatissimam Mariam Virginem quae iure meritoque a Christo originem et efficaciam trahat. Exoptamus ut tu, Venerabilis Frater Noster, nunties participantibus quam pretiosum sit christifidelibus exemplum Matris Dei quae provocet christifideles ad profundorem in Deum fidei oboedientiam arctioremque spiritalem cum Eius Filio communionem. Ne praetermittas quin Archiepiscopus Spalatensis-Macarscensis ceterique adstantes Praesules, Sacerdotes, Patres et Fratres Ordinis Fratrum Minorum aliique religiosi viri mulieresque necnon omnes Christifideles laici Nostro salutentur nomine Nostramque erga se benevolentiam sciant.

Instanti denique prece Omnipotentem Deum exoramus, ut diligenter officium tibi concreditum expleas, ita ut omnes anniversaria participantes uberibus gratis a Domino ditentur. Caelestium verum donorum conciliatrix et nuntia esto Benedictio Apostolica, quam tibi, Venerabilis Frater Noster, libenter in Domino impertimus, quam item ad omnes congregatos volumus pertinere, a te et ab illis petentes auxilium precationum vestrarum pro officio Nostro Petrino exercendo.

Datum Romæ, apud Sanctum Petrum, die XX mensis Maii, anno MMXV, Pontificatus Nostri tertio.

FRANCISCUS

[01307-LA.01] [Testo originale: Latino]